



GLION

Dominicanas iniciativas ed engaschadas

2020 ei vegniu fundau ella Casa da sentupada dallas **dominicanas** a Glion il «**Forum per la cultura da pasch**». La stad d'igl onn vargau ei quai forum vegnius arranschaus per l'emprema gada sut il tetel «Stad da Glion» (Ilanzer Woche). Uonn ha l'occurrenza liug dils 7 – 13 d'uost. Gest d'uront quai temps, ils 8 d'uost, festivescha la Cuminonza dominicana la fiasta da siu fundatur: sogn Dumeni che fava era in grond promotur dalla pasch.

Stentas da scaffir spazi per futur e pasch

Da gliendisdis Pastgas han uonn era representantas dalla claustra da Glion, sora *Monika Hüppi*, cussegliera generala dalla Communidad monastica e *Christine Imholz*, menadra dalla procura dallas missiuns dalla soras da Glion, priu part al marsch al Lag bodan sin la via internaziunala dalla pasch. A Bregenza han ellas purtau in transparent per la pasch – sco segn encunter l'uiara ell'Ucraina e per la cultura da pasch – schizun cun ina inscripziun romontscha.

Claustra per temps

La claustra da Glion offerescha era dimoras per temps en claustra. Mo paucas dettien denton triev a quei desideri. La dunna, che habitescha per temps en claustra, separticipescha allas oraziuns quotidianas dil convent en baselgia e vegn era a meisa culas soras. Ella liquidescha era tenor cunvegnientscha differentas lavurs en claustra.

Nova destinaziun per la veglia Claustra

1970 ha la Cuminonza claustrala da Glion bardigliu dalla veglia claustra sper il spital si el niev marcant monasteri sur il marcau da Glion. Zacons onns ei la scola da tgira stada domiciliada egl anteriur baghetg claustral, tochen ch'ella ha deplorablamein stuiu vegnir serrada. Cul temps ei il vegl baghetg dalla claustra cul curtin vegnius vendius per diever dad in niev project ed intent. La fuorma externa dalla claustra veglia ei vegnida mantenida per gronda part – sin intervenziun dalla protecziun da monuments. Endadens la veglia claustra ei denton vegniu endrizzau denter auter da niev habitaziuns e stanzas da terapia. Davos la veglia claustra si ses'aulza uss in ault bloc da habitat. L'entira imposanta e representativa surbaghegiada scumma «La residenza sogn Giusep».

Crappa d'in auter liug

La crappa per l'exposiziun «midada dalla rasada» a Glion ha stuiu vegnir alzada ord il liug oriund, allontanada e transportada suenter naven da glatschers, bovas ni entras intervenziuns dils carstgauns ella natira dils loghens fixai definitivamein. Leu hai dau in'inscenaziun artistica (exposiziun) cun blocca da crappa dall'entira Surselva els loghens elegi – per il cuoz da treis onns. Davos quell'iniziativa star igl artist da Glion *Christian Aubry*. Bauns da seser e meditar davart ils deponats dat ei era fetg damaneivel dalla claustra.

Plein speranza en in avegnir

Las soras da Glion semettan adina puspei sin la via che meini nus en in avegnir plein speranza, malgrad che biaras dad ellas ein attempadas. Ellas vesan bein ils cunfins, mo selain nuota stermentar dallas sfidas. Dapi Tschuncheismas uran ellas perquei di per di ch'il capetel general dalla Cuminonza claustrala da Glion gartegi quest atun tenor il motto: «Il Segner scaffeschi en sia tenda in vast spazi per futur e pasch.» (cdm/gc)